



重濬三江水利全案卷一

大學士兩江總督

臣

孫玉庭江蘇巡撫

臣

韓文綺跪

奏再三吳水利爲東南財賦攸關本年夏秋淫潦異漲雖非常有之事然積水泛溢江浙大郡悉遭水患實由太湖分洩水道年久淤墊去路不暢所致查太湖跨江浙蘇常湖三郡週圍數百里凡杭嘉湖宣歙諸路之水無不匯歸太湖由三江分趨於海三江形勢在太湖東北爲劉河卽古之婁江東南由黃浦入海者爲東江其中卽爲吳淞江蘇郡居太湖西北其水道一向東南流通吳江震澤以趨劉河一向北流通

常熟昭文二縣分入白茆七鴉口福山口歸海自乾隆二十八年大加疏濬之後劉河吳淞白茆雖會先後興挑然未窮源竟委逐節疏通每遇雨少之年海潮挾沙往來清弱不能暢出滌沙日漸淤墊其間河港泖蕩瀦水之區非日久爲茭草湮塞卽爲趨利奸民佔築圍墾致多阻格旱則水不通流灌溉難資潦則諸水匯於太湖僅藉一綫吳淞爲去路勢不能不泛溢爲患數郡士民莫不延頸跂踵仰望大加濬治維時水勢汪洋無從查勘措手臣等深恐積水難消二麥不能播種難以安定人心察看情形惟劉河一

支分洩較爲切近先將前此疏河餘贖銀款飭令松太道龔麗正提交太倉州張作楠就該河淺處抽溝疏導加以天時連晴數月積水漸消高田均得涸種而低窪之區猶未盡乾涸則以三江尾閘未暢太湖水勢尙旺也設今不治則湖面未能騰空一遇夏秋水發實爲可慮但地連數郡欲加挑疏非週歷確勘深悉情形無從措手施工江蘇兩屬地方官各有應辦事件亦少諳悉河務之人查有因公降調原任淮海道沈惇彝因有銷算事宜自浙江原籍赴浦該道老成廉幹熟諳河務臣等商之河臣黎世序於其事

重刊三江水利全案 卷一 二
竣派調來蘇會同松太道歷勘大概情形三江白茆
間段淤淺處甚多皆宜挑濬設開啟閉使蓄洩有方
旱澇有備以收久效若僅圖目前水利旋疏旋淤徒
滋勞費於事無益臣等查江浙東南數郡爲
國家財賦之區水利不修一遇旱澇歉收不但歲額蠲
緩兼需發

帑賑貸得失判然第工鉅費繁籌辦非易必須再加確
切估計通盤打算措置有方始可縷晰條分據實上

陳恭候

聖裁臣等受

恩深重固不敢輕率興舉難圖厥成亦不敢畏難苟安坐
致貽誤現與司道府州悉心商榷並咨浙江撫臣一
體查議博採衆論集思廣益籌措經費分年次第興
辦期於

國計民生稍裨萬一容俟得有成議另行詳晰陳奏請
旨遵行謹先附片奏

聞謹

奏道光三年十二月二十七日具

奏道光四年正月二十八日奉到

硃批通省水利攸關甚鉅豈有坐令貽誤之理必當隨時

相度計出萬全方爲克稱職守然要在得有實效勿徒費周章也悉心查勘妥議具奏詳慎行之欽此

工部爲奏

聞等事都水司案呈內閣抄出禮科給事中朱爲弼奏江蘇省海口下游壅塞以致上年江浙兩省均被水患應及時擇要修濬以奠民居而安農業一摺道光四年三月十六日奉

上諭給事中朱爲弼奏海口下游壅塞請擇要修濬一摺上年江浙兩省夏秋雨水較多浙江之杭嘉湖江蘇之蘇松太倉均被水患據該給事中奏稱江蘇省海口壅塞以致浙江上游均受其困現在劉河三泖俱已淤墊蘇松之水橫趨泖澱浙西下游之水口先爲江蘇省各

水所占遂至潰決四出田廬被淹嘉湖二府受患尤甚請趁水潦未降之時於劉河吳淞及附近太湖一帶確勘情形大加疏濬爲一勞永逸之計事關兩省水道農田前據孫玉庭等奏籌措經費次第興辦經朕飭令查勘妥議具奏迄今未據奏到著孫玉庭韓文綺迅派幹練大員前往海口下游將何處急宜疏治何處可緩施工分段估計擇要疏挑其應如何籌款妥辦之處據實具奏欽此欽遵抄出到部應行兩江總督江蘇巡撫一體欽遵查照可也須至咨者

道光四年四月二十日到

大學士兩江總督

臣

孫玉庭江蘇巡撫

臣

韓文綺跪

奏爲勘明三吳水利酌分先後興修恭摺奏懇

聖恩借項辦理以疏壅滯而衛民生事竊

臣

等前將江蘇

省應辦水利事宜附片會陳欽奉

硃批通省水利攸關甚鉅豈有坐令貽誤之理必當隨時相度計出萬全方爲克稱職守然要在得有實效勿徒費周章也悉心查勘妥議具奏詳慎行之欽此仰見

皇上念切勤民工期實濟

臣

等跪誦之下欽服難名當經

飭據蘇松太道龔麗正會同調派勘估之原任淮海道沈惇彝督同太倉州知州張作楠及該管府州縣

等徧歷各屬水道確勘情形酌籌辦法並由藩臬兩司會議分別緩急稟辦前來臣孫玉庭曾經臣奏明於校閱蘇松營伍之便順道查勘吳淞江劉河等處臣韓文綺亦卽親往江震下游一帶周歷泖湖浦港逐加看視伏查江浙之水以太湖爲巨浸延袤數百里承納杭嘉湖宣歙諸路來源禹貢所謂震澤周禮所謂具區是也太湖之水奔赴而東則必由運河以達三江由三江以注大海其間又有支河泖港湖蕩浦塘爲之次第傳送必使節節通暢派別流分來者可容去者無阻然後無汎溢之害而有灌溉之利

占之稱三江者曰東江曰吳淞江曰婁江迨後東江失其故道遂以江震下流澱泖一帶歸於黃浦江之水當之此東南入海之路也吳淞江西承江震運道東合黃浦尾閘此居中入海之路也婁江卽今之劉河坐落太倉州境此東北入海之路也婁江之北又有白茆河坐落常熟昭文縣境分承蘇屬之長元吳常屬之江陰無錫諸水下注揚子江尾入海此又於三江之外別爲一大支者也以上四者皆太湖所由歸海之要道未便闕一不治惟是一時並治工鉅費繁蓋總道雖祇四條而港汊不啻百出水之行於地

下猶血脈之行於人身一節未通卽百節因而受病試以大端言之如治東江則凡在黃浦上游自太湖邊牛茅墩浪打穿唐家湖一帶及運河東西諸港並入泖出泖凡歸黃浦各水道均應逐節疏通而大泖圓泖長泖多已成爲蕩田淤塞尤甚小民惑於近利但冀目前之水可變爲田不知他日之田悉淪於水今爲大局而計不可不挑切寬深以除阻遏也治吳淞江則自江震境內之十七橋十八港起並瓜涇港寶帶橋兩絡均爲湖水入淞之咽喉而港身多屬蘆灘橋洞半皆積土下及龐山湖大斜港一帶蘆蕩尤

多其自青浦之四江口以迄上海之萬安渡幹河旣須大挑支河亦須徧濬也治婁江則自鮎魚口胥口銅坑口之沿湖蘆灘及木瀆市河蘇州城河並崑新太鎮沿城河道均須擇要挑濬其自半涇灣以至海口雖經上年捐辦抽溝而未能寬展尙須大加開挖使之通暢也至白茆一河上流不甚淺塞自渡船橋以東幾至淤成平陸惟挑濬深通俾有建瓴之勢始足以資宣洩也又凡江尾入海之處必有海潮往來來則挾沙去則淤墊昔人云每一潮約淤一錢之厚以一日兩潮計之經年累月卽已不勝其淤故前人

之治三江必先修建閘座潮來則下版以禦之潮去則啓版以刷之亦猶河工蓄清敵黃之意從前吳淞劉河皆有石閘白茆亦有滾水壩近惟劉河之閘修理較易其餘皆已廢壞漫無關束溯查乾隆二十八年修濬三江水利一次祇就彼時現存閘座爲之經理迨嘉慶二十三年吳淞江雖曾重濬而閘座已壞未議修建是以逐漸灌淤江身仍復淺窄今欲爲久遠之計不惟切灘挑濬務在寬深且須建閘禦潮以時啓閉凡此皆導湖入江導江入海之辦法也若論一勞永逸之舉原應全工統辦一氣呵成所以不敢

遽議者則以

國家費有常經而閭閻力有未裕耳然東南財賦所出若不設法籌辦一遇旱潦爲災不但蠲緩額糧且須發

帑賑貸何以上紓

國計下裨民生臣等再四會商惟有於各條水道之中擇其除害尤急需費較輕者先行修治其餘分年興辦庶工用可期湊手查吳淞江係太湖正派理應先辦然工段最爲綿長而閘座又須重建據委員約估挑挖土方及建閘工料幾及四十萬兩其劉河白茆

亦據分段約估合計兩處所費較之吳淞一處僅多萬餘兩但劉河稍偏於北而白茆更在北隅論地勢皆南下北高論水性則去高就下上年蘇州府屬被水之處常昭二縣較崑新江震爲輕蓋由沿江皆有垵身高於腹地之故今權其勢之緩急則白茆與劉河祇可暫緩而酌其費之重輕則吳淞江亦不得不緩臣等督同司道及府州縣相度機宜惟有將太湖下注黃浦之一路先行挑濬緣該處地勢偏於東南爲江震二邑下流上年該二邑被水最重至今尚有未涸之田亟須謀爲宣洩且黃浦最稱深暢因其勢

而導之卽爲衆水之所爭趨並浙省杭嘉湖之水亦皆得有歸宿據委員所估約需十五六萬兩經費較爲節省臣等擬將此股水道卽於今年先辦其吳淞劉河白茆等處請俟明後兩年以次挑淤建閘務期一律深通不使稍有草率將就之弊此又臣等審度時勢酌分先後辦理之情形也至此項經費查乾隆二十八年成案係先借

帑給辦仍按田畝徵還伏思事關水利民田本應民捐民辦惟是上年被災之後民力拮据疊蒙

恩旨下頒正供尙在蠲緩似此工繁費鉅自難先事鳩資

皇上軫念民依有加無已臣等仰體
聖慈惟有循照成案懇

恩借

帑與辦仍於工竣後按照得沾水利之州縣分年攤徵
還款查江寧江蘇兩藩庫各有封貯銀四十八萬兩
原備本省緊要公用今三吳水利事係要需似應於
該款內借動惟查辦理災賑各案已將封貯銀兩陸
續
奏明借撥多未歸還是以江寧捐監案內奉

旨收足十萬兩先行解部續收五萬兩歸補封貯而蘇藩
庫復開捐監案內先以籌辦直隸水利概令解京繼
又奉準部行即將此款歸補封貯臣韓文綺於本年
二月分奏報監銀片內聲明江寧收捐一十萬三百
五十兩江蘇收捐五萬兩應俟解部備撥今臣等復
思本省應辦水利攸關甚鉅而所擬借動之封貯本
款一時尙少實存合無仰懇

皇上天恩將前次奏報監銀共一十五萬三百五十兩先
準畱於本省提歸封貯款內以充本年辦理東江一
路水利之用並請此後兩藩庫續收捐監銀兩概令

暫緩解部儘數提還封貯之款卽於該款內陸續墊給水利經費以便分年挑濬俟封貯原數補足仍將監銀全行解京其按畝攤徵之銀應如何酌別分數何時攤起何時徵完容再察看輿情

奏明定議如此一轉移間於要工大有裨益而東南民力可以就紓益當頂頌

皇仁同歌樂利如蒙

俞允_臣等再飭該司道等先將本年應辦工段方價確加細估開具銀數清單縷晰覈

奏一俟冬令水落卽行興工其餘分年工段亦隨時估

計

奏辦總期工歸實用不使稍有虛浮並遴派廉能熟諳之員分投承辦明立賞罰章程其奮勉妥速者分別存記事竣量請

恩施如草率遲延或查有偷減立即嚴參懲治不敢稍事姑容至疏展河道或逢灣切嘴或對灘抽渠因而挑挖民田勢有難已其陞科者查明豁賦酌給墾資私佔者勒限剷除如違究辦_臣等益殫竭愚誠任勞任怨恪遵

批諭詳慎籌辦不敢徒費周章俾東南財賦之區害去利

重刊三河水利全案 卷一
二
興以仰副

宵旰勤求於萬一所有勘議先後借款辦理緣由謹合詞

恭摺具

奏並繪圖貼說恭呈

御覽伏乞

皇上聖鑒訓示謹

奏

再_臣等正在會議具奏間於邸報中恭讀

上諭給事中朱爲弼奏稱江蘇省海口壅塞以致浙江上游均受其困現在劉河三泖俱已淤墊請趁此水潦未

降之時於劉河吳淞及附近太湖一帶確勘情形大加疏濬爲一勞永逸之計事關兩省水道農田前據孫玉庭等奏籌借經費次第興舉經朕飭令查勘妥議具奏迄今未據奏到著孫玉庭韓文綺迅派幹練大員前往海口下游將何處急宜疏治何處可緩施工分段估計擇要疏挑其應如何籌款妥辦之處據實具奏欽此伏查三江水利_臣等自奏蒙

諭旨後業經履勘籌辦除將現在分別緩急次第辦理緣由_臣等已於正摺陳明恭候

訓示外惟朱爲弼奏內有趁此水潦未降大加疏濬之語

查刻下已交夏令似難戾水興挑若必急切施工設
遇大雨時行仍恐歸於無益語云夏不挑河乃歷來
辦理之成法惟有仰懇

聖恩仍照_臣等前議於冬令水落之時分投挑挖以期工
歸實用費不虛糜是否有當合併附片陳明伏祈

聖鑒謹

奏道光四年四月二十二日具

奏道光四年五月二十三日奉到

硃批另有旨欽此並奉

上諭一道道光四年五月初八日內閣奉

上諭孫玉庭等奏勘明三吳水利酌分先後借項興修一
摺江蘇吳淞江劉河等處及江震下游一帶泖湖浦港
因積年久遠淤墊甚多據該督等奏稱此時籌議修濬
工鉅費繁請於各條水道中擇要先加修治其餘分年
興辦著照所議除吳淞江劉河白茆均暫緩辦理外所
有太湖下注黃浦一路爲江震二邑下流上年被水較
重急須宣洩深通著俟本年冬令水落先行興工其估
需銀兩若令民捐民辦實難先事鳩資著準其借帑興
修仍於工竣後按照得沾水利州縣奏明分年攤徵還
款至該省此次辦理水利工關緊要著韓文綺卽將前

重刊三江水利全案 卷一
次奏報捐監銀一十五萬三百五十兩畱於該省提歸封貯款內以備工需並此後兩藩庫續收捐監銀兩概行暫緩解部儘數提還封貯之款卽於該款內陸續墊給水利經費以便分年挑濬俟封貯原數補足仍將監銀解京備撥餘俱照所議行至另片覆奏朱爲弼所請於水潦未降時疏濬江蘇海口下游現在已交夏令勢難急切施工並著於冬令水落時分投挑挖以期工歸實用帑不虛糜該部知道欽此

工部爲具奏事都水司案呈內閣抄出京畿道監察御史程邦憲奏請濬治太湖洩水要道以導壅滯而達海口一摺道光四年三月二十六日奉

上諭御史程邦憲奏請濬治太湖洩水要道一摺前據給事中朱爲弼奏請濬海口下游當經降旨飭孫玉庭等派員擇要疏挑又據御史郎葆辰奏請修太湖漚港亦飭帥承瀛委員勘估酌修茲據該御史奏稱太湖匯全吳之水全賴入水之口與出水之口一律疏暢若致力於海口下游而不去太湖淤墊雨水過多橫決四出蘇松嘉湖諸郡俱受其害若專治湖州漚港又挾天目諸

山之水奔注東來吳江一帶要口仍任淤墊入海不能
迅速則蘇松之患滋甚是專治上游專治下游均未見
有利益惟擇太湖洩水最要處所如吳江隄之垂虹橋
愛遺亭龐山湖及隄西等處疏剔沙淤剷除蕩田令太
湖東注之水源流無滯蘇松嘉湖諸郡可免泛溢吳淞
劉河諸下游亦得藉源刷沙不致旋濬旋淤事關兩省
水道農田自宜合兩省形勢通盤籌畫爲一勞永逸之
計著孫玉庭韓文綺迅派幹練大員會同浙省確實查
勘擇要疏挑並嚴立科條禁止栽種茭蘆及絕流插籬
壅積泥淤等弊如查有土棍勾串吏胥及生監把持包

庇將應行剷除蕩田刁指畱難串通朦混卽行嚴拏懲
辦欽此欽遵抄出到部應行江蘇巡撫欽遵查照可也
須至咨者

道光四年五月初一日到

大學士兩江總督臣孫玉庭江蘇巡撫臣韓文綺浙江巡撫臣帥承瀛跪
奏爲修濬江浙兩省水道請

旨專派大員綜司其事以冀一律周妥仰祈

聖訓事竊照江南省之蘇州松江常州三府太倉一州與
浙江省之杭州嘉興湖州三府均係水鄉境地毗連
全在各處河道通行無滯以資利益農桑邇來河身
多有墊淤海口未能暢達兼以塘閘損廢蓄洩乖方
偶遇霪霖異漲不免泛溢是虞臣等體察情形亟宜
設法修濬因卽彼此札商各將本境來源去委先行
派員分別查勘業經臣孫玉庭臣韓文綺將三吳水

利酌分先後緩急恭摺奏

聞其浙西三府水道及先修太湖漕港之各塘閘亦經護

理浙江撫臣黃鳴傑查明具

奏在案嗣臣孫玉庭等承準

廷寄欽奉

上諭御史程邦憲奏太湖匯全吳之水全賴入水之口與出水之口一律疏暢若致力於海口而不去太湖淤墊雨水過多橫決四出蘇松嘉湖諸郡均受其害若專治湖州漕港又挾天目諸山之水奔注東來吳江一帶要口仍任淤墊入海不能迅速則蘇松之患滋甚是專治

上游專治下游均未見有利益事關兩省水道農田自宜合兩省形勢通盤籌畫爲一勞永逸之計著孫玉庭韓文綺迅派幹練大員會同浙省確實查勘擇要疏挑等因欽此仰見我

皇上軫念民依

智周慮遠跪誦之下欽服難名隨經恭錄咨移并派原任淮海道沈惇彝馳赴浙省會同杭嘉湖道陳鍾麟將水道形勢逐一勘明會稟前來臣等伏查蘇杭等六府一州惟杭州一府地勢最高嘉興湖州常州次之蘇州松江太倉爲最下杭湖二府地多層山峻嶺且

近連宣歙諸山其水源甚衆皆匯注太湖分歸江省之黃浦吳淞婁江三路入海嘉興一府大半無山故水源亦少其各路河水自杭州流入者十之八自湖州分入者十之二皆從江省泖澱二湖歸黃浦江入海而太湖延袤五百餘里蘇常湖三府皆環居其濱其大泖圓泖長泖坐臨松江上接嘉興又有首擊尾應之勢是疆域雖分兩省而源委實共一流若浙省專治上游江省專治下游則地勢各有所便脈絡不能相通卽令上下皆治而中間仍多隔閡是非綜攬全局由源竟委必不能使上下游一氣呵成本年四

月間臣帥承瀛自浙進京路過蘇州及清江浦地方

會遇臣孫玉庭臣韓文綺將此事詳細面商以同條

共貫之水本屬無分畛域須得一公正明達之大員

綜司其事較之兩省委員分辨更可一律周妥當查

江浙各司道中非本籍隸居兩省卽於兩省情形未

及盡知惟江蘇臬司林則徐器識遠大處事精詳曾

任浙江杭嘉湖道及江南淮海道其於浙西三府地

方均爲熟悉而水利諸事亦速所究心以之綜辦兩

省修濬事宜實堪勝任臣等再三商酌意見相同臣

帥承瀛在京

陛見時將會商緣由奏蒙

聖明俯允

諭令會同臣孫玉庭等具摺陳

奏茲臣等復又往返札商相應會摺恭懇

皇上天恩準以江蘇臬司林則徐綜辦江浙水利實於兩省均有裨益惟查歷次挑濬河道施工皆在秋冬迨春漲之後卽應停止請將林則徐仍畱江蘇臬司本任毋庸開缺如遇秋冬之際常川在工不能兼顧暫將臬司印務另行委員署理俟停工時仍令回任其工次移行文牘未便帶用臬司印信查蘇松太道向

委兼理關務本有道關兩印其道印堪以借用工停仍卽給還至該司往來江浙兩省履勘督辦在在均需費用現暫卸本任例只支食半廉該司以職分較大不敢另行請給公費惟大小委員盤纏薪水及隨帶書役飯食紙張不得不酌量籌給應請於

奏明經費內覈實支發務使撙節用度不稍浮濫第兩省應用經費亦復多寡不同俟該司統勘明確分段覈估議定章程另行詳悉奏

聞由各本省動款分別給辦似此責有專屬事無兩岐彼此絕推諉之私高下有貫通之益自見全河順軌蓄

洩咸宜數郡生民共臻樂利益沐

聖主恩施於無既矣臣等謹合詞恭摺具

奏伏乞

皇上聖鑒

訓示謹

奏道光四年閏七月十六日具

奏

途次接前院韓 寄到前摺奉

硃批另有旨欽此同日奉到道光四年八月初二日內閣
奉

上諭孫玉庭等奏修濬江浙水道請專派大員一摺江南
省蘇州松江常州三府太倉一州與浙江省杭州嘉興
湖州三府均係水鄉近來各處河道多有墊淤海口未
能暢達兼以塘閘損廢偶遇異漲時有泛溢經該督等
會同勘明水道形勢疆域雖分兩省原委實共一流自
應專任大員綜攬全局以期一律周妥著照所請卽派
江蘇臬司林則徐綜辦江浙水利無庸開缺如遇秋冬
常川在工著將臬司印務暫行委員署理停工時仍令
回任其工次移行文牘準其借用蘇松太道印工停給
還至該司履勘督辦在在均需費用且往來兩省爲時

較久除支食半廉外仍著孫玉庭等酌給工費以資辦理其大小委員及隨帶書役應給薪水等項俱準其在經費內撙節支發毋稍浮濫俟該司統勘明確分段覈估後著該督等議定章程由各本省動款分別給辦欽此又於江蘇臬司林則徐綜辦江浙水利句旁奉硃批卽朕特派非伊而誰所請甚是欽此

大學士兩江總督臣孫玉庭江蘇巡撫臣張師誠跪
奏爲勘估三江水利遵

旨通盤籌畫應行先修各工恭摺奏
聞仰祈

聖鑒事竊照本年四月間臣孫玉庭會同前撫臣韓文綺
請將蘇省水利酌分先後借項興修一摺欽奉

諭旨著照所議除吳淞劉河白茆均暫緩辦理外所有太湖下注黃浦一路爲江震二邑下流上年被水較重急須宣洩深通著俟本年冬令水落先行興工餘俱照所議行等因欽此嗣經臣孫玉庭會同前撫臣韓文綺浙江

撫臣帥承瀛具

奏請派江蘇臬司林則徐綜司其事林則徐旋以母憂
去任奉

旨勅令另行委員接辦臣等札商前任浙撫臣帥承瀛以
現乏兼諳兩省水利之人綜理既難其選不敢率保
仍當各省分任責成會同覆

奏又奉

上諭江浙司道中既無堪令總理之員著孫玉庭等即責
成現在勘估工程之蘇松太道龔麗正杭嘉湖道陳鍾
麟留蘇降調道員沈惇彝等帶同熟諳估工員弁前往

確切摺估公同承辦事關兩省水道農田雖係各就各
境分段疏濬而河道總屬同條共貫必應合兩省形勢
通盤籌畫上下一律通暢不致旋濬旋淤方為一勞永
逸之計等因欽此仰見我

皇上念切民生

訓示明備臣等跪誦之下欽服難名伏查三江水利原應
全工統辦一氣呵成前因需費浩繁不得不酌分緩
急是以將太湖下注黃浦一路

奏請今年先辦惟浙省河道係在上游蘇省係在下游
浙省工程較少本年一律籌辦上游既已疏暢若下

游只濬黃浦一路恐不足以資容納自當欽遵續奉諭旨合兩省形勢通盤籌畫查吳淞江係太湖正派幹河必須一併先辦庶浙省上游之水有兩路宣洩毋憂泛濫浙省撫臣黃鳴傑亦以兩省利害所關爲念隨即咨準浙省飭委同知王鳳生署通判楊春煦與龔麗正等會勘來蘇面議並與藩臬兩司公同商確僉以疏濬吳淞兩省俱有利無害意見均屬相同臣等卽委蘇松太道龔麗正原任淮海道沈惇彝督同該府縣及咨調來蘇之河工員弁勘估挑辦去後茲據該道等稟稱太湖下注黃浦一路其地偏於東南爲

吳江震澤下游自太湖出水諸港由運河而入泖湖由泖湖歸於黃浦各水道均應從源竟委節節疏通惟舊時泖湖廣闊大半已成蕩田勢難普律挑濬且向來亦無濬湖之理祇須水得通流卽歸妥善今勘得青浦婁縣吳江震澤華亭五縣承太湖下注歸入黃浦一路各支河或河身淺滯或淤灘阻礙應挑應切各工逐段詳細勘明共估土四十萬四千七十餘方需銀九萬五千八百餘兩例應分別乾土水土淤土暨河底甬撈等工方價不一按照南河挑工土方間月則例分別酌估有減無增較嘉慶二十三年挑

河方價尤爲節省連估築柴壩單長共計需銀九萬五千八百餘兩至吳淞江一路係太湖下注之幹河其地在正東自太湖出水諸港穿運河由龐山湖及寶帶橋瓜涇兩路東流之水歸入吳淞下達上海出閘外與黃浦合流入海縣長二百六十餘里今來源不能暢入去路又多阻塞其間港浦無復舊形是不獨吳淞江首尾均應一律開挑卽縱浦橫塘亦宜分別修濬以期流行通暢方爲完善第以現在江水之淺深測地形之高下上游尙可緩治而逼近尾閘受淤最厚之處必當先濬查江之四江口井亭渡以下

江身曲狹水漸紆遲潮退卽形枯淺此時擇要施工自應先從四港口井亭渡起至萬安渡迤下之曹家渡止通計江身六十里許深者至六尺淺者一二尺寬者八九丈狹者七八丈實不足以資容納宣洩亟應大加挑濬今勘得江身在青浦嘉定上海三縣境內應挑各工及挑老河身淤淺逐段詳細勘明共估土一百一十六萬九千九百餘方該處情形與江震各邑及澱湖情形稍異應分深淤淺淤兩則酌中定議共需銀三十萬五千一百餘兩等情由藩司誠端臬司賀長齡覆覈會議具詳前來臣等悉心覈議該

司道等所詳勘辦情形甚爲精細估計亦甚撙節除劉河白茆等處應照原奏分年接續辦理又江震青婁等處以及吳淞之支河港浦擬歸次要各工續行估辦外所有現估各工乘此冬令農隙之時卽令分頭興工循照向來按圖雇夫之例責成各該縣各就地方情形或舉董事經理或督率委員自行妥辦總期工歸實在不致稍有虛糜趕緊雇夫應役照時價易錢畫一給發毋許稍有剋扣勒派等弊所有估修黃浦吳淞兩路工需銀兩應卽在於
奏準借給之捐監撥歸封貯款內按數動給俟三江全

竣之日通盤覈明攤徵還款其展挑漲灘之處空廢蕩田在所不免此等蕩田俱由侵佔官湖而成歷年已久現飭查明如有業經陞科者應予豁賦已屬從寬辦理毋庸再給產價至此案工程經費係借

帑辦理應行攤徵還款卽屬民捐之項查嘉慶二十三

年借帑捐挑吳淞江成案欽奉

恩諭以工係民捐毋庸造冊報銷此次事屬相同應請免聖主其造冊送部報銷以示體卹臣等現在詳議章程督飭司道等實力稽查隨時親臨察驗嚴定勸懲務使

工不虛糜項歸實用以仰副
聖主惠偏農田永資利賴之至意容俟工竣覈實驗收再
恩備行具

奏外所有遵

旨通盤籌畫應行先修各工估辦緣由謹合詞恭摺具

奏並將現應挑濬修築處所逐條開具詳細清摺并繪

圖貼說恭呈

御覽再查吳淞江入海之處從前原有四孔大閘以時啟
閉堵禦渾潮年久損壞以致江身下游被淤據司道
等僉謂應行修理并應先築攔潮大壩方可屏水施

工正在勘估間接準署浙江撫臣黃鳴傑咨開據委

員王鳳生等稟稱以浙省杭嘉湖三郡近年山浙盡墾

闢土鬆易卸每遇大雨溪水皆黃是上游之沙壅已

多若下游建閘潮長輒閉流將益緩不如去閘之便

等情咨商前來臣等查此次興舉水利事關兩省必

須彼此均能有利無害方為盡善建閘一節浙省既

謂非宜應令司道等虛衷熟商或修或止與浙省悉

心妥議斟酌萬全再行另

奏合併陳明伏祈

皇上聖鑒訓示謹

奏

謹將勘估黃浦吳淞兩路應修各工逐條開繕清單

恭呈

御覽

一青浦縣泖塔之旁東西兩沼頭俱淺東沼頭水面尤寬難以施工惟西沼頭之兩灘嘴應煞壩挑切又於西沼頭直對大爛路之間水底暗灘應估挑挖以順水勢

一婁縣古浦塘爲漕船入泖之路淤淺應濬其古浦塘東接市河一段及跨塘橋迤東一帶均河底較淺又

該邑南門外米市塘爲下注黃浦南口均應挑濬又冒家圩尾及雪水涇孟家堰等處蘆灘間段估切剷除

一吳江震澤兩縣運河以東各湖蕩勢甚寬闊難以一律全濬惟應擇要估辦俾得一氣通暢其間港形窄狹夾岸墳廬如吳江之垂虹橋愛遺亭等處村冢稠雜難以展寬祇可酌爲挑切其無墳廬而爲水道最要者展寬以兩邊老岸爲界濬深則照現在水面深四尺爲準

一華亭縣境內南俞塘鹽鐵塘通波蕩等處及繞城河

道亦應挑辦

以上太湖下注黃浦一路除稍次各工暫行從緩或
應續辦或歸民修再行分別辦理外先擇最要應
辦挑各工共估土四十萬四千七十四方零共銀九
萬五千八百四十一兩零

一吳淞江江身在青浦嘉定上海三縣向爲太湖洩水
東注之正幹縣長二百六十餘里南北支港繁多原
應首尾一律開挑并縱橫浦塘亦應修治惟以現在
江水之淺深測地形之高下上游尙可緩治而逼近
尾閘受淤最厚之處必在先其所急自應先從四港

口井亭渡起至萬安渡迤下之曹家渡止逐處測量
現在四港口以東灘漲漸多黃渡以下尤爲淺窄且
野雞墩一帶至六灣頭等處江勢迴環潮沙更見壅
積通計江身六十里亟宜大加疏濬其黃渡新江身
現既估挑所有該處北邊之老吳淞江係受鹽鐵吳
塘兩路來源可引注黃渡江身藉助清水是以將老
江身三處一併估挑

以上太湖下注吳淞江一路除稍次各工暫應從緩
再另行估辦外先擇最要應挑各工共估土一百一
十六萬九千九百四方零共估銀三十萬五千一

百七十四兩零百四十六兩零共計銀三千零五十一

再此次勘估各工臣等再四覈減如黃浦一路原奏約估銀十五六萬兩今覈實估計僅用十分之六節省甚多吳淞一路亦與原奏約需之數相仿均屬撙節辦理其一切應需公費不準灑入工內稍有隱混惟工程較大所有委員薪水書役飯食以及辛工紙張及置辦器具搭蓋棚廠燈燭獎賞人夫等項需費甚繁實屬必不可少之用若令各縣自行籌備勢必藉詞賠累難免虧空之弊查乾隆二十八年臣撫莊有恭

奏辦三江水利有刻本紀略一書內載河工工程銀兩每百兩扣銀五兩除解部平飯外餘存公用現係借帑興工按田徵還歸款毋庸造冊報銷不必另解部飯但一切估工等款在在均多費用請以每百兩扣存五兩作平飯一項畱貯司庫為充公之用等語此次工程亦係借

帑徵還臣等現在請免報銷與前案悉屬相同所有一切雜費既無別項籌動亦未便飭屬捐貼臣等再四熟商惟有仰懇

聖恩準照乾隆二十八年成案將每百兩扣存五兩畱貯

聖恩司庫以資雜用俾各縣無可藉口貼賠於工程更為
覈實臣等仍當督同司道確覈撙節支發不使稍有
浮濫理合附片具

奏伏祈

聖鑒謹

奏道光四年十二月初三日具

奏道光四年十二月十九日奉到

硃批另有旨欽此又附片一件並奉

硃批另有旨欽此同日奉到道光四年十二月十一日內

閣奉

上諭孫玉庭等奏通籌三江水利請借項先修各工一摺
江浙興辦水利事關兩省水道農田節經降旨飭令通
盤籌畫酌分先後以次興工茲據孫玉庭等查明青浦
婁縣吳江震澤華亭五屬承太湖下注黃浦各支河淺
滯淤阻應挑應切共估需土方並柴壩單長計銀九萬
五千八百餘兩又吳淞江口為太湖下注幹河由上海
出閘與黃浦合流入海因去路阻塞流行不暢應於受
淤最厚之處大加挑濬共估需土方銀三十萬五千一
百餘兩此兩路工需銀兩著準其在捐監撥歸封貯款
內照數動給俟工程全竣之日攤徵還款其空廢蕩田

如有陞科者準予豁賦毋庸再給產價並著援照民捐成案免其造冊報銷現屆冬令農隙之時著新任總督魏元煜等卽責成各該地方官各就坐落處所雇夫應役分投趕辦毋得虛糜草率及稍有剋扣勒派情弊至吳淞江口四孔大閘近因上游杭嘉湖等府溪河每多沙壅若再向下游修建閘壩堵禦渾潮必至阻遏上游來水殊於浙省未便其應否修築之處著悉心酌商妥議具奏再另片奏此次工程較大一切應需工費甚煩並無別項可以籌動著準照乾隆年間奏辦水利之案將河工工程銀兩每百兩扣存五兩畱貯司庫預備雜用俾各縣無可藉口賠累以昭覈實該部知道欽此

兩江總督臣魏元煜江蘇巡撫臣張師誠跪

奏為續估吳淞江河道現因雨水連縣應行暫緩興挑
以免草率貽誤恭摺

奏祈

聖鑒事竊照疏濬三江水利上年四月間經前督臣孫玉

庭前撫臣韓文綺會

奏因需費浩繁酌分緩急先後借項興修請將太湖下
注黃浦一路先行挑濬緣該處地勢偏於東南為江
震二邑下流由泖湖而直達黃浦歸海浙省嘉湖上
游之水亦得有所歸宿將泖浦水道於道光四年冬



原件短缺

P33

間興辦其吳淞劉河白茆等處請俟道光五六兩年
以次興挑欽奉

諭旨著照所議除吳淞江劉河白茆均暫緩辦理外所有
太湖下注黃浦一路爲江震二邑下流上年被水較重
急須宣洩深通著俟本年冬令水落先行興工餘俱照
所議行等因欽此嗣因咨準浙省委員來蘇與司道等
會商以浙省地居上游現擬開濬湖州七十二澗則
太湖以下吳淞江一路必須同時興工方爲妥善飭
據該司道等將勘估吳淞江銀數土方會詳經臣張
師誠會同前督臣孫玉庭

奏前來查前任督撫臣原奏本係先挑太湖下注泖浦
一路其吳淞劉河白茆等處請俟五六兩年以次興
挑嗣因浙省委員來蘇會勘以浙江湖郡七十二澗
若先開通恐遇淫潦吳淞下游不能宣洩致有壅漲
之虞必須兩省同時興工方可循科灌注是以復飭
該道等前往勘估吳淞計需銀三十餘萬兩
奏奉

諭旨準修臣等卽飭有工各縣照估集夫挑辦期於今春
竣事惟吳淞一路河道縣長開工興辦必須毫無阻
滯一氣呵成方能有濟乃自上冬十二月望後雨雪

連旬吳淞潮汐甚旺曹家渡大壩潮水長至七八尺及丈餘不等現在打壩戽水較之原估工價已屬不敷更恐春雨連綿未能剋期蒞事且因高堰現興大工錢價驟昂每銀一兩僅易錢一千五六十文較之上年十一月分錢價每兩少換一百餘文計三十餘萬兩之工程虧短錢價至四萬餘千之多照時折算則方價不敷按數補足則工員賠累頗形格礙且時屆春令東作方興農民有事田疇按圖集夫已屬不易又以換錢較前頓少食用不敷未能踴躍應雇且遇雨即停若至三四月間未能完工更與農田有礙

該司道等轉據各縣稟請將吳淞江工程暫緩挑辦係屬實在情形臣等復查黃浦雖偏於東南地勢低下極為通暢吳淞雖為太湖下游澣河遠不及黃浦

之寬深浙省上游之水多由鶯脰湖橫趨黃浦入海今黃浦一路業已開濬浙省嘉湖之水可資宣洩吳淞暫緩半年亦可無礙目前雨水既多若必強令趕完恐致草率從事且或半途而廢糜費已多即參賠亦屬無濟臣等因時度勢不敢以

奏準在先稍有迴護所有吳淞工程應請緩至本年初冬農隙之時再行照估興辦其時高堰工竣錢價自

必漸落冬令雨水亦少較易爲力輿情旣屬允協要
工亦得備臻覈實矣至浙省各漚港應如何酌量一
體分別緩急之處當咨明浙省撫臣查照辦理其太
湖下注黃浦一路銀數較少工程易竣仍飭司道督
同該府縣等專力妥辦勿任稍有率延謹將現在情
形不能不分別辦理緣由合詞恭摺具

奏伏乞

皇上聖鑒謹

奏道光五年正月十六日具

奏道光五年二月十二日奉到

硃批所見甚是著依議行欽此

兩江總督臣魏元煜江蘇巡撫臣張師誠跪

奏為遵照部文將捐監銀兩陸續解京所有吳淞江挑

工經費不敷應請轉行停辦以重庫項而節糜費恭

摺具

奏仰祈

聖鑒事本年二月初一日接準戶部咨開各省收捐監生

銀兩

奏明暫緩歸補封貯俟收足五萬兩即行解部等因

摺奉

旨依議欽此行文遵照前來當即轉行藩臬各司欽遵辦

理去後茲據蘇州藩司誠端臬司賀長齡會詳稱江蘇兩藩庫收監生銀兩前經

奏明儘數提歸封貯留備本省辦理三江水利之用業奉

諭旨允準在案現奉戶部奏請將各省捐監銀兩暫緩歸補封貯俟收足五萬兩即行解部所有吳淞江原估工程及擬接辦修閘築壩等項無款可籌應行緩俟經費充足再行確勘稟辦以期一勞永逸等情詳請具

奏前來 臣等查蘇省疏濬三江水利經前督 臣孫玉庭

前撫 臣韓文綺飭委蘇松太道龔麗正原任淮海道

沈惇彝勘估約需工價銀九十餘萬兩請將江寧蘇

州兩藩司收捐監生銀兩留於本省提歸封貯款內

以充辦理三江水利之用嗣據該道龔麗正等勘明

將太湖下注黃浦一路先行挑濬估需銀九萬五千

八百餘兩其挑濬吳淞江正河估需銀三十萬五千

一百餘兩原擬次第接辦旋因上年十二月間雨雪

連旬且因高堰興辦大工錢價驟昂比較原估時價

虧短頗多又時屆春令農民有事田疇集夫不易經

奏 臣等查合與懇請再行詳請辦理業蒙

奏請緩至冬令農隙之時再行估辦業蒙

俞允在案茲接準戶部咨稱各省捐監銀兩已經

奏明收足五萬兩卽行解部自應遵照辦理查吳江震

澤華亭婁縣青浦等縣由太湖下注黃浦一路先經

發銀趕挑現據陸續具報統計已得六七分工程卽

日可以完竣飭委

奏派綜理三江水利之臬司賀長齡前往查勘據稱吳

淞江逼近海口每日兩潮積沙約有一錢之厚僅挑

正河江身水力微弱不能刷沙禦潮必須將江之兩

旁支港全開暢導來源使之衆水會歸力能刷沙加

以修閘禦潮築壩束水方可期諸久遠約計添估各

工除原估挑濬江身動撥捐監銀三十餘萬兩外尙

須銀二十餘萬兩始敷辦理現在續收捐監銀兩旣

須解部是水利案內祇有已經提歸封貯銀二十四

萬一千餘兩除動撥黃浦一路挑河銀九萬五千八

百餘兩外僅存銀二十五萬四百餘兩尙不敷濬辦

吳淞江正河之用所有接辦各工更屬無款可籌卽

或勉強另湊數萬兩止濬江身不疏來源支港難免

旋挑旋淤則此三十餘萬之工程不能必收成效事

關

重刊三江水利全案 卷一
國計民生不得不格外慎重與其欲速而未見全功不如暫緩而可期實濟且黃浦一路工竣後下游已可通暢吳淞暫停數年亦尙無礙自應緩俟經費充足之時封貯銀兩有款可借再行確勘情形查照原奏辦理其時或將支河汊港照業食佃力之例歸民自辦或應一併借

帑攤徵之處屆期覈實查辦請

旨遵行所有江蘇捐監銀兩應自本年二月初一日接準部文之日每收足五萬兩卽委員解部至太湖下注黃浦各工仍應趕緊挑濬覈實驗收毋任稍有草率偷減如此分別酌辦則水利已有一路疏通而解部之項亦可源源起解似屬兩有裨益是否有當臣等謹合詞恭摺具

奏伏乞

皇上聖鑒謹

奏道光五年三月初九日具

奏道光五年四月十二日奉到

硃批另有旨欽此同日奉到

諭旨一道內開道光五年三月二十六日內閣奉

上諭魏元煜等奏請暫行停辦吳淞江挑工一摺江蘇省

疏濬三江水利向由藩庫提歸封貯款內動辦茲據奏太湖下注黃浦一路工程即可完竣惟吳淞江逼近海口估挑正河及疏濬支港來源需費較多現在捐監銀兩卽應解部該省經費不敷辦理所有吳淞江挑濬各工著暫行停止其黃浦應挑工程仍著趕緊辦竣覈實驗收毋許草率偷減該部知道欽此

兩江總督

臣

魏元煜江蘇巡撫

臣

張師誠跪

奏爲驗收江震等縣水利要工如式完竣恭摺奏祈

聖鑒事竊照蘇省興辦太湖下注黃浦一路水利工程爲江浙兩省衆水合流入海之道於蓄洩灌溉最關緊要上年疊經

奏派蘇松太道龔麗正降調原任淮海道沈惇彝逐細勘估復因綜理之臬司林則徐丁憂去任又

奏派布政使賀長齡綜理其事并札飭該司隨時斟酌機宜務期妥速原請將吳淞江一路一併興挑嗣值奉提捐監銀兩解部所存經費不能充裕復經臣等

奏奉

諭旨將吳淞緩辦則黃浦一路工程更爲著重臣等節次嚴催趕辦去後茲據該司詳稱現辦吳江震澤華亭婁縣青浦五邑各工上年原係一律合勘祇緣雇募民夫本難驟集且河身紛錯悉爲民間汲飲灌溉所資不能同時築壩必須分段先後接挑該司本年奉委覆勘正在陸續興挑之候卽將上承下注情形細加比較實覺河身之曲直土性之堅浮不無移步換形自應酌量增減以期詳略得宜隨查據吳江縣稟請減辦方尖港一處震澤縣稟請減辦尾市河黃市

河外二處青浦縣稟請將泖河挑鬲二工酌減口底婁縣稟請減辦雪水涇六七兩段米市塘尾段二處又經該道龔麗正沈惇彝等復勘將婁縣西門市河及秀塘橋迤西一段並華亭境內之繞城河南俞塘婁縣合轄之繞城河通波塘吳江震澤之各橋洞礙難挑深等處俱應酌減臣等尙恐各該縣或有畏難推諉草率遷就情事當飭該司復加察訪確因比較上承下注情形兼以沙土衝刷河勢變遷必得酌加刪改庶工皆覈實而費不虛糜通計五縣各工原估銀九萬五千八百餘兩今刪減銀一萬八千六百餘

兩實辦工價銀七萬七千二百餘兩自上年十一月初十日開工起至本年五月十五日止一律催報全完詳請驗收等因臣張師誠卽與藩司賀長齡攜帶各冊分路前往驗收查得江震二邑之太湖水口與青浦之傳送泖湖以及華婁之匯歸黃浦等處河道俱各暢流旱澇可期有備洵屬工歸實用美利咸沾卽吳淞暫緩興挑已可無虞壅滯其減辦工段亦係實在情形臣魏元煜覆覈無異除飭該司道妥議善後事宜並將借動工價應否俟吳淞等處續辦各工全竣再行分年攤徵歸款緣由確定章程俟詳覆至

日另行具

奏外所有驗收江震等縣承挑水利各工如式完竣日期臣等謹合詞恭摺奏

聞伏乞

皇上聖鑒謹

奏

再興辦太湖下注黃浦一路工程頭緒紛如查勘匪易臣等鼓勵工員示以懲勸自上冬開工以來正值雨雪寒風兼旬累月在事印委各員無不沾泥涉水晝夜辛勤現在要工業已報完銀數減於原估河道

極形通暢毫無浮冒偷減其勞績實不可泯惟人數較多臣等不敢濫保自應查明出力最著之員覈實保

奏仰懇

皇上天恩量加甄敘除調任藩司誠端辦理一年悉心稽覈籌維極為周細現任藩司賀長齡綜理調度實力稽查照察精明秉公覈實前任臬司林則徐前歲冬間即已辦起嗣又綜理江浙兩省全局講求經畫費盡心力蘇松太道龔麗正勘辦周妥來往督催始終勤奮但係司道大員不敢籲請

恩施即降調原任淮海道沈惇彝於前年奏調來蘇疏消積水周歷江浙兩境確勘估計極著勤勞嗣後督辦五縣工程不遺餘力該員曾任監司亦不敢以疏瀹微勞仰邀議敘惟該員熟悉河工宣勤兩載現值南河大工需人之際應請畱於南河工次差遣委用俾得及時自効其府廳知縣佐雜各員內或催辦認真或估覈精細均能不辭勞苦不避嫌怨實屬最為出力謹開具名單分別註明請陞請補恭呈御覽可否仰懇

恩敘以昭激勸之處出自

聖慈至婁縣知縣徐夢熊承辦該邑河工不能趕緊興挑以致陰雨連綿完工最後雖非有心遲誤究屬辦理稽延應請

旨交部議處此外尙有派辦工程隨同勘估各員亦屬出力第以人數衆多未敢概登薦牘已飭藩司酌量分別獎勵所有臣等酌分懲勸緣由謹合詞附

奏伏乞

聖鑒訓示謹

奏

謹將委辦江震等縣水利要工最爲出力之府廳知

御覽

縣佐雜各員開具名單恭呈

計開

蘇州府總捕同知范博文

該員催辦江震工程認真稽覈精細周詳洵屬實心任事之員請以應陞之缺陞用

咨補靖江縣巡檢周恭壽

該員自前年派辦水利事宜查勘太湖源委嗣後隨同勘估驗收始終出力實屬辦事認真不避嫌怨應請遇缺儘先陞用

重刊三河水利全案 卷一
青浦縣巡檢方景雯

該員隨勘各工頗能詳細其辦理泖湖工程尤極勤
妥該員官聲素好應請遇缺儘先陞用

候補主簿陳德培

該員上年派勘水利工程並繪圖估算奉委分催均
能認真出力該員係賑案

奏準儘先補用人員應請無論繁簡遇缺卽補

嘉定縣縣丞姚大成

該員派催工程自冬涉夏不憚辛勤業已兩次俸滿
均經保薦候陞應請以知縣儘先陞用

以上五員係請分別陞補

蘇州府知府額騰伊

該員派管水利局務籌辦精詳督催江震二縣工程
均極妥善

知州銜長洲縣知縣俞德淵

該員專管水利總局經理得宜勞績昭著

松江府知府楊樹基

該員督催所屬各工認真查覈晝夜宣勤

前署青浦縣高郵州知州李宗穎

該員辦工極爲妥協

前署華亭縣崇明縣知縣王青蓮

該員辦工亦屬妥協

以上五員俱請交部從優議敘

道光五年六月初五日具

奏

兩江總督臣琦善江蘇巡撫臣陶澍跪

奏爲覆勘黃浦一路水利工程查驗如式併將辦工各員覆覈定議仰祈

聖鑒事竊臣等承準軍機大臣字寄道光五年六月十八日欽奉

上諭江蘇興辦太湖水利前經該督等奏派司道並降調道員沈惇彝等逐細勘估分飭委員興挑茲據魏元煜等奏稱驗收黃浦一路挑工完竣請將降調道員沈惇彝畱於南河差委承辦遲延之婁縣知縣徐夢熊交部議處並請將在工出力之同知范博文等五員分別陞

補知府額騰伊等五員交部從優議敘此項工程關係江浙兩省水利最爲緊要現在興挑完竣必須一律如式方資利賴著琦善等再行詳加勘驗是否工歸實用帑不虛糜其所保各員是否允協降調道員沈惇彝應否畱於南河差委及知縣徐夢熊辦工遲延之處覆覈定議據實具奏到日再降諭旨將此諭令知之欽此欽

遵

臣

琦善因督辦河漕正當喫緊之際未克分身當

經移咨

臣

陶澍就近親往勘驗於七月初九日自蘇

州起程先赴吳江震澤縣境察看太湖水勢旋由青浦泖湖至華亭婁縣匯送黃浦之處逐細履勘所有

估挑各工其誌椿灰印業經前撫

臣

張師誠暨藩司

賀長齡於赴工驗收時照例起除此時已無從查對而兩岸水痕及口底寬深丈尺併岸旁挑積之土仍屬確有可憑隨即按冊探量牽繩較驗與原估俱屬相符測量水勢自四五尺至八九尺不等從太湖下

注黃浦一路悉屬流通工歸實用並無偷減虛糜情

事復徧加察訪上年承辦各員於嚴寒風雪之際趕

緊集夫挑挖周歷催查不辭勞瘁尙屬認真出力惟

臣等查此項工程初議將吳淞江等處一併辦理嗣

因經費浩大僅辦黃浦一路較原估工程祇四分之

一銀數亦止七萬有餘工段無多司道大員固不敢仰邀

恩施卽蘇州府知府額騰伊松江府知府楊樹基亦屬分內應辦之事應與前署青浦縣李宗穎前署華亭縣王青蓮及隨同辦工之嘉定縣縣丞姚大成皆毋庸議敘至總催工程之蘇州總捕同知范博文專司總局之知州銜長洲縣知縣現請陞補蘇州府督糧同知俞德淵實心實力經理尤爲得宜應請

旨交部從優議敘又咨補靖江縣巡檢周恭壽青浦縣巡檢方景雯候補主簿陳德培均係微員兩載以來隨

同估濬跋涉辛勤始終竭力應請照前督臣魏元煜等原奏將周恭壽方景雯二員儘先陞用陳德培一員前於辦賑案內

奏準儘先補用應請無論繁簡遇缺卽補至降調原任淮海道沈惇彝經前督臣等聲請畱於南河差委查該員應赴部選現在工次人員尙堪敷用無須畱工差委惟該員自前年奏調來蘇疏消積水估催工段兩載江干其勞績亦不可泯可否同現任人員一併交部議敘之處出自

聖主格外

天恩又婁縣知縣徐夢熊因承辦工段稍長適值陰雨完竣在後查明尙無遲誤究屬辦理稽延應請

旨交部察議至原估各工前督臣因經費不敷摺節減辦以之疏利農田原有裨益惟明年試行海運各州縣漕剝船隻不下數千經行塘浦湖汊甚多已飭各屬將從前未經估挑處所逐細相度倘或有礙漕行卽須設法疏通免致臨期周章其餘善後事宜並借動工價應否俟吳淞等處續辦工竣再行分年攤徵歸款之處業經前督撫臣飭令司道妥議章程俟詳覆至日臣等另行覈奏所有遵

旨覆勘緣由謹合詞恭摺覆

奏再臣陶澍勘竣工程業於七月十六日回省辦事合併聲明伏乞

皇上聖鑒謹

奏道光五年七月二十三日具

奏道光五年八月二十九日在江寧公署奉到
硃批另有旨欽此同日奉到道光五年八月十三日內閣
奉

上諭琦善等奏覆勘水利工程查驗如式併將辦工各員覆覈定議一摺江蘇興辦太湖水利前據魏元煜等奏

驗收黃浦一路挑工完竣請將辦工各員分別畱工議處議敘降旨交琦善等覆覈具奏茲據該督等奏查驗各工並無偷減虛糜情弊訪察承辦各員尙屬認真惟所辦工程較原估祇四分之一工段無多所有蘇州府知府額騰伊前任松江府知府楊樹基前署青浦縣李宗穎前署華亭縣王青蓮及隨同辦工之嘉定縣縣丞姚大成均著毋庸議敘至總催工程之蘇州府總捕同知范博文專司總局之知州銜長洲縣知縣現任蘇州府督糧同知俞德淵經理均屬得宜俱著交部從優議敘其咨補靖江縣巡檢周恭壽青浦縣巡檢方景雯候補主簿陳德培隨同估濬始終竭力周恭壽方景雯俱著儘先陞用陳德培無論繁簡遇缺卽補降調道員沈惇彝估催工段尙爲出力亦著交部議敘無庸畱工差委卽飭令該員赴部候選婁縣知縣徐夢熊承辦工段尙無貽誤惟辦理稽延著交部察議該部知道欽此

兩江總督臣琦善江蘇巡撫臣陶澍跪
奏再江蘇省興辦太湖下注黃浦一路水利工程勘估
工價銀七萬七千二百餘兩借動
帑項於本年五月間興挑完竣經前督臣魏元煜撫臣
張師誠驗收

奏報聲明借動工價應否俟吳淞等處續辦各工全竣
再行攤徵歸款飭俟司道議詳再行辦理等情在案
茲據司道具詳前來臣等查蘇省當道光三年水災
之後民間元氣未舒緩帶錢糧現須分別啟徵如將
此案水利工需於此時卽行攤徵民力實有未逮查

吳淞江水道將來籌有經費自應一律興挑所有現辦黃浦工程借

帑銀七萬七千二百餘兩合無仰懇

皇上天恩俯准暫予寬限俟將來吳淞江全工完竣再行一併攤徵歸款庶民力得以展紓庫項亦不致懸宕理合附摺具陳伏乞

皇上聖鑒訓示謹


奏道光五年十二月二十一日附片具

奏道光六年正月二十二日奉到

硃批另有旨欽此同日奉到道光六年正月初七日內閣

奉

上諭琦善等奏前借興辦水利銀兩懇暫緩攤徵等語上年江蘇省興辦黃浦一路水利工程借用銀兩應行攤徵歸款茲據該督等查明該省自被災之後民間元氣未舒緩帶錢糧現須分別啟徵若將此項水利工需卽行攤徵民力實有未逮著照所請準其將現辦黃浦工程所借銀七萬七千二百餘兩暫予寬限俟吳淞江全工完竣再行一併攤徵以紓民力該部知道欽此



戶部謹

奏為遵

旨議奏事內閣抄出署兩江總督等奏查明江蘇省道光
十年以前民欠攤徵銀數開單奏請豁免一摺道光
十六年十一月十二日奉

硃批戶部議奏單併發欽此續據江蘇巡撫造具請豁銀
數清冊送部隨將冊造吳淞江全工有無完竣行查
工部去後今於十二月初七日準工部查明咨覆到
部據該督等原奏內稱仰蒙

恩旨查豁各款民欠錢糧飭司將各屬挑築河隄等工借

款攤徵銀兩按年按款據實開報茲據江寧布政使楊簧署蘇州布政使裕謙等將實欠在民確數開單詳請具奏查江寧淮安揚州徐州海州五府州屬截至道光十年止應徵還銀一百二十三萬七千六百六十兩五分八釐四毫除已完解司並報入三次清查參案虧缺及完存屬庫未解各項共銀四十三萬七千六百五十一兩八錢八分九釐外統計實欠在民及因災緩帶未完並未屆徵限共銀八十萬八兩一錢六分九釐四毫蘇州松江常州三府屬除孟瀆河續借挑河建閘等銀八萬六千七百二十四兩六錢五分二釐借領在十年以後仍應照案攤徵外截至道光十年止實在民欠並災緩未完及未屆徵限共銀二十萬六千九百三兩九錢二分二釐均係實欠在民此內雖有未屆徵限而借款領辦係在十年以前請一律蠲除等語_臣等伏查道光十五年八月初九日欽奉

恩旨將道光十年以前實欠在民者全行豁免當經_臣部

欽遵行文該省查辦在案今據該督等將江寧蘇州兩屬道光十年以前挑辦河隄等工實在民欠借款攤徵銀兩查明具奏_臣等檢齊借款各原案查明啟

徵年分內寶應縣道光九年借款挑辦通湖開工未完司庫銀四千五兩一錢一分五釐宿遷縣道光九年借款挑辦六塘民便沐河未完司庫銀三萬八千四百五十八兩八錢九分七釐高郵州道光十年借款挑辦新河運鹽等河未完司庫銀二萬四千六百六十兩二錢三分六釐均係道光十年始行攤徵不得遽指爲民欠又武進縣道光十年挑濬孟瀆等河借動緩漕米價銀十二萬兩十二年據報工竣十五年始據起限攤徵尤在

恩旨截止年分之後所有以前四案攤徵未完銀十八萬七千一百二十四兩二錢四分八釐未便率行議豁應請

旨敕令該督等仍令查照原奏限期按數攤徵歸款以昭限制此外江淮揚徐海五府州屬借款攤徵計三十二案未完銀七十三萬二千八百八十三兩九錢二分一釐四毫蘇州松江常州三府屬借款攤徵計五案未完銀八萬六千九百三兩九錢二分二釐借款年分遠者在嘉慶年間近者亦在道光七年以前或因災遞緩或屆限未完既據該督等查明均係實欠在民臣部先於安徽省請豁案內援照乾隆六十年

及嘉慶二十三年成案奏奉

諭旨一體予豁此案事同一律應將前項攤徵未完民欠銀八十一萬九千七百八十七兩八錢四分三釐四毫仰懇

天恩全數蠲免以示體卹恭候

命下

臣

部將冊內覈與原借數目不符之款開單行文該

督等查明不符緣由分晰造冊題銷至安東縣挑辦中河民堰借動司庫銀三萬六千四百七十九兩四錢五釐冊內僅稱從嘉慶二十四年起分作十年攤徵借款何年仍令該督等專案咨結再已完項下松

江常州二府屬造入嘉慶二十三、四、五并道光十二、三、四、五、六等年春秋各撥冊及道光三、六、十等年耗羨冊內共銀一萬八千八百五十二兩七錢六分

臣

部覈對造報銀數均屬相符毋庸置議惟已解司府

各庫并完存屬庫等款江淮等屬共銀四十萬六千

五十兩二錢一分七釐外邳州溢完覈減銀一百三

十六兩三錢七分三釐蘇松常三府屬共銀一萬九

百九十五兩八錢六分應令該督等卽飭提解司庫

分別造報撥用又安東縣完存屬庫馮立嶸參案虧

缺銀七千二百二十九兩六分二釐

臣

部覈與原參

案內銀數不符並令該督等查明聲覆又江淮等屬已報入三次清查追補銀二萬四千三百七十二兩六錢一分靖江縣報入三次清查追補銀三千四百四十一兩二錢五分一釐仍令該督等查明完報年分咨部覈結所有_臣等覈議緣由理合恭摺覆奏伏乞

皇上聖鑒謹

奏道光十六年十二月十八日具奏十九日內閣奉
上諭上年

皇太后六旬萬壽前經降旨普免道光十年以前民欠錢糧

令各該將軍府尹督撫等查明具奏據林則徐等將江蘇省挑辦河隄等工實在民欠借款攤徵銀兩查明請旨當交戶部覈覆茲據查明自嘉慶年間起至道光七
年止江寧淮安揚州徐州海州五府州屬借款攤徵計
三十二案未完銀七十三萬二千八百八十三兩零蘇
州松江常州三府屬借款攤徵計五案未完銀八萬六
千九百三兩零共銀八十一萬九千七百八十七兩零
均實欠在民著加恩概行豁免該督等卽刊刻謄黃徧
行曉諭嚴禁吏胥影射需索等弊務期實惠及民用副
朕推恩布闔至意餘著照所議飭行該督等查明聲覆

分別覈辦欽此

